

PISA E A CORSICA

Una conferenza fatta in CERVIONI

u 17 aprile 1973 da :

ANTON DUMENICU MONTI

Una volta... - mi scusu di principià un racontu storicu cum'è averrebi principiatu una fola, ma tanti struitoni hanu dettu e ripetutu chì a duminazione pisana nantu a Corsica è stata dolce e prufittevule, chì mi permettu st'introitu – dunque, una volta, ci era un papa geniale è inchjucutu, una città ricca e culunialista, in Isula in daretu di i so affari e disgraziata.

U fattu stalvò in l'annu 1077.

U papa era Gregoriu VII ; a città : Pisa ; l'Isula : a Corsica.

Gregoriu VII era chjuculettu e goffacciu. A vedelu, nimu l'averebbe credutu capace di regge incù talentu l'affari di a Chjesa. Ma, l'ochji luccicavanu, e si capia chì l'omu era di canerchia.

Quandu, quattu anni nanzu, avia pigliatu pusessu di u tronu di San Petru, avia tiratu i so piani, e, ciò chì più li premia, era :

- d'impone à i preti d'esse scapuli di donne,
- di toglie à i laici u dirittu ch'elli si avianu pigliatu di numinà i preti,
- di fà di l'Europa una grande republica sottu guvernu di u papa,
- e di scaccià i Turchi di Terra Santa.

E certa chì u prugrammu era imbiziosu. U primu puntu, per esempiu, era difficiule à realizà. Pensate à u strappacore di i preti chì devianu mette e moglie fora di casa ! Eppoi era vulè cuntrarià a natura... Eppuru, sapemu chì Gregoriu VII hà vintu e chì i so successori hanu fattu cunservà i so decreti.

In quantu à u secondu puntu, ci era ancu più spine. I conti, i rè, l'Imperatore, ùn vulianu perde u cuntrollu di u cleru, un cleru gerente di u casale d'una Chjesa ricca mensa. Custantinone e Carlumagnone ùn arebbenu mai addimessu tanta preputenza.

Arrigu IV, ancu ellu, trovò strane e pretensioni di u papa. E, cusì scuppiò a celebre guerra di l'investiture trà Gregoriu VII è l'Imperatore d'Alemagna.

U papa scummunicò l'Imperatore, ciò ch'è vale à dì ch'ellu dumandò à u populu di rinegallu. L'Imperatore cuntrattacò, ma u papa avia ben'preparatu u colpu e sapia ch'ellu pudia cuntà nantu a fede di u bassu populu è nantu l'imbizione di a signuria alemana.

U 25 gjennaghju 1077, Arrigu ghjunse in Canossa per ricunosce i so torti. Dicenu ch'ellu era vestutu cum'è un frate, e scalzu. Paria fatta apposta ! l'invernu era più freddosu chè mai. E l'Imperatore aspettò trè ghjorni, à u celente, l'assoluzione papale.

Si porebbi crede ch'è u papa ùn avia altri pensieri sottu a u capuziettu... è fù ghjustu à puntu tandu ch'ellu pensò à mette a Corsica sottu a tutela di Pisa.

Pisa era una grandissima cità. Facia, da più à menu, vintimila abitanti – ùn incriccate !... aghju ben'dettu vintimilla. Era assai à quella epuca... Parigi, ch'è era digià Parigi, ùn avia micca un miraculu di più, è, e so case di legnu, i so carrughji fanghigliosi, facianu ch'è u nome di Lutezia, ch'è vole di Padual, li sindava megliu.

Pisa s'era sviluppata à un'inturchjata di l'Arnu, nantu un situ anticamente occupatu da l'Etruschi, eppoi da i Rumani, à dece chilometri da u mare dui milla anni fà, à quindici chilometri à i ghjorni d'oghje.

L'Arnu hè un fiume scemu. Ogni tantu a piena sburra è face di e soie. Arricurdemuci i danni fatti in Firenze d'aprile 1966. Ma, stu fiume è navighevule da u mare à Firenze, e, per fiuminale, si entre ind'è l'Appenini senza difficoltà. Intornu à u fiuminale si stende a pruvincia toscana. Di sta ricca cuntrata, i Pisani cacciavanu ciò ch'è li ci vulia per campà... e ancu pruserà : u legname da e muntagne, l'oliu è u vinu da i pughjali, e biade è e pecure da e pianure, i pesci da u mare.

Gh'è u mare ch'è fece a fortuna di Pisa. Di regula, u famitu feghja in terra per circà a granella ; u techju, ellu, pesa u capu è si ne v'è a scopre venti. I Pisani eranu più techji chè famiti è si fecenu navigatori.

In l'ondecimu seculu, u scalu di foce d'Arnu era u solu portu nutevule in sù renaghju longu cinquecentu chilometri ch'è v'è da Genuva à Ostia.

Da un pezzu, i battelli pisani sulcavanu u Mediterraniu, e, passatu Gibraltar, navigavanu à tramuntana.

Da u principiu di u novesimu seculu, Pisa era digià u puntellu di a Cristianità contru i Turchi – dicu Turchi, cum'elli dicianu l'antichi, ma avete capitu chì si tratta di a sterpa di Macumettu, ch'elli sianu Sarracini, Arabi, Mori o Barbareschi.

Allora, minu si maraviglierà chì u papa abbia aiutatu a cità di Pisa à diventà una putenza culuniale, accunsentenduli a duminazione nantu a Sardegna è nantu à a Corsica.

A Corsica di l'ondecimu seculu, cumu l'aghju detta, era disgraziata. Da chì i Rumani si ne eranu andati, i Barbari eranu scalati da u nordu, e i Turchi da u sudu. Poi, prufittendu di a gratitudine di a Cristianità in generale, è di i Corsi in particolare, l'omi chì avianu scacciatu i Turchi avianu impostu a so signuria à un populu spadrunatu, aprendu cusì u tempu feudale di a nostra storia.

Certe volti, unu di sti signori supranava l'altri, cum'è ind'è a seconda medità di u decimu seculu, Arrigu, dettu Bel Messer, patrone da Carbini à Bonifaziu, chì messe sottu tutela l'altri signori di Corsica. Dicenu chì Arrigu era generosu è di bon'indule, è si parla ancu oghje di a so manera di fà a ghjustizia. Ma, in l'annu mille, l'hanu tombu, è hanu annegatu i so sette figliulucci maschji sottu à u ponte di Cavru.

Pare chì s'intese una voce chì dicia :

" E mortu u conte Arrigu Bel Messere,

" e Corsica sarà di male in pughju ".

E u celu si scatinò per ottu ghjorni. U tempurale zappò i campi di granu quandu a ghjente si appruntava à fà è sighere.

L'estate fù fame nera, è l'invernu fù tantu pessimu chì sterpò è bande di l'animali.

U s'ècondu millenari dopu Cristu principiava incù un'annata di caristia. E dopu tutti si malanni, ghjurse a pesta.

San Ghjuvanni l'Evangelistu, in l'Appoccalisse, avia dettu chì, passati i mille anni, u diavule si sarebbi scatinatu, è, esciutu da prigiò, averebbi curottu tutte è nazioni. Ci vole à crede chì u so calculu era ghjustu... è a Corsica era a prima à andassine à l'abissu. Un' ci era nè clemenza nè ghjustizia, ma gattivera è tirania. Conti, baroni, gentilomi, e sinu à l'ufficiali incaricati d'amministrà a ghjustizia, tutti eranu in bischizzu trà elli, è u populu, per forza o per amore, pigliava parte à e lite.

Qualchì volta, accadia chì u populu stancu arpiassi, e si è vistu, in qua è in da, qualchì rivolta comunale. Certe cumunità decise, si sbarazzavanu di sti duminatori, è si davanu un patrone elettu in piazza publica. Ma, ben'prestu, u novu patrone, buscu u titulu u si tenia, è ùn operava micca megliu chè l'altri.

Secondu u storicu Pier'Antoni Montegiani, di Viscuvatu – un storicu chì scrivia ind'è a seconda medità di u XVIu seculu, ghjuvendusi di un'altra storia, quella di Ghjuvanni di a Grossa – rivolta comunale a più impurtante di l'ondecimu seculu scuppiò ind'è e pruvincie di u Nebbiu è di Mariana, voltu 1062. E pupolazioni, decise à vive " *à populu e cumune* " - cum'elli dicianu tandu – vulendu francassi di a vindetta di i baroni, s'indirizzonu à a Santa Sede chì mandò u marchese di Malaspina, di Massa di Maremme, per guvernà a Corsica à nome di u papa.

Incù successu, u marchese fece a guerra à i signori, ma sette anni dopu si morse, è l'affari vultonu cum'è nanzu.

Eccu induve ne era a Corsica in l'annu 1077, quandu l'Imperatore s'arricumandava à u papa à u pede di u castellu di Canossa.

U castellu di Canossa era inalpellatu nantu una piricuccula di l'Appennini, vicinu à Reggio Emilia. Era a pruprietà di a cuntessa mattilda, figliola di Bonifaziu II, marchese di Toscana, cum'è quellu Bonifaziu chì sottu à u regnu di Louis-le-Pieux, scacciò i Turchi di Corsica è edificò a cittadella di Bonifaziu.

Orfana di babbu da un bellu pezzu, orfana di mamma da un annu, governava sola a Toscana, una di e sette marche di u Regnu d'Italia. In legge era incaricata d'amministralla à contu di u Rè Imperatore, ma in fatti pigliò pretesa per u so amicone u papa.

Dopu a famosa ghjurnata di u 25 ghjennaghju 1077, quandu l'Imperatore fece u so " *mea culpa* ", u papa gose u so successu senza spicciassi di raghjunchje a capitale.

U ritornu si fece di settembre, in cumpagnia di a fida Mattilda chì avia decisu – o si era lasciata scunvince – di fà donu di i so stati à a Chjesa rumana. L'attu di dunazione fù firmatu subitu ghjunti, ind'è a cappella Santa Croce di u palazzu Lateranu.

E furmalità è e cunsequenze pulitiche di l'attu funu studiate durante u longu viaghju.

Parlonu ancu di a Corsica... U papa pensò di fanne una carta suprana ind'è u mazzulu ch'ellu preparava : in primu locu, sottumette l'isula à a Chjesa ; in secondu, falli serve l'interessi marittimi è cumerciali di Pisa, di manera ch'è Pisa, in scambiu, possi ghjuv' à l'interessi pontificali.

U primu settembre, Gregoriu è Mattilda essendu ghjunti in Siena, u papa fece una pruclamazione à a Corsica, à i so cunsigli è à u so populu, ricummandanduli u legatu ch'è ellu avia decisu di mandalli : Landolfu, vescu di Pisa.

U sedeci settembre, in Roma, precisava a so idea ind'è una lettera à i veschi di Corsica, à i nobili, à l'abitanti maggiori è minori : "*Sapete, dicia, ch'è per duvere o per dirittu di pruprietà, l'isula ùn appartene à nimu ch'è à a Santa Sede, è quelli ch'è sinu à oghje l'hanu tenuta per forza, senza rende nisunu serviziu à a Chjesa, senza nisuna fedeltà è sottumissione à u beatu Petru, s'ò culpevuli di sacrileghju è hanu messu in periculu l'anima soia*".

Poi, aghjunghjendu ch'è certi amichi cumuni l'avianu fattu sapè ch'è i Corsi vulianu esse governati da a Santa Sede, si rallegrava, è prumettia a prutezzione di l'armate toscane. E certa ch'è u donu di Mattilda li permettia su tonu è se parulle piene di superbi a.

Finalmente anunziava ch'è u vescu di Pisa venerèbbi à riceve u ghjumentu di i Corsi : "*L'avemu incaricatu d'accedè l'isula à nome di San Petru è à nome nostru, è di governalla incù primura*".

Landolfu ghjunse in Corsica. Fù ben'accoltu. I signori, i vassali, è cumunità ch'è venianu à "*populu e cumune*", tutti accettonu u putere di a Santa Sede.

A dilla franca, era u putere di Pisa.

Per dà una spiegazione à st'infeudazione, bisogna à vede ciò ch'èlle eranu, in l'ondecimu seculu, è strutture pulitiche è amministrative di u Regnu d'Italia.

U Regnu d'Italia era spartutu in cuntee, ch'è, più à menu, currispundianu à i viscuvati.

Parechji cuntee cuncolti facianu una marca... governata da un marchese.

Eppoi ci eranu è cità, induve u conte delagava i so puteri à un viciconte, ma ch'è eranu in traccia di diventà cumune libere.

A marca di Toscana – capitale Lucca – era governata da u marchese di Mantova. A quelli tempi era Mattilda, è a chjamavanu a grande cuntessa. Avemu vistu ch'ella tenia pocu contu di u putere ch'era sopra ella.

Per amministrà a cità di Pisa, c'era, in pi ù di i viciconte, un " *gastaldo* ", - diceremu un intendente. Era incaricatu di e pruprietà di u Rè, è stava in Lucca.

L'unu è l'altu ùn avianu nisuna autorità nantu a cità. Tutti i puteri : spirituali, tempurali è ghjudiziarri, eranu in manu di u vescu, è u vescu patrone era ellu.

Qualch'annu dopu, Pisa riformerà è so istituzioni : consuli eletti guverneranu veradimente, ma senza entre in lotta incù u vescu.

In u 1077, e nove istituzioni ùn eranu ancu stabilite, è u fattu di mandà à Landolfu in Corsica valia sottumissione di l'isula à a cità di Pisa.

D'altronde, l'annu dopu, Gregoriu precisava i puteri di u vescu. Ne facia u so vicariu, denduli fondu è fruttu in più di l'autorità religiosa è pulitica, ma riservendusi quantunque a medità di l'entrate ind'è u presente, è i trè quarti per più tardi.

Ci vole à specificà ch'è a nomina era per u vescu di Pisa è micca per Landolfu stessu. Fendu cusì, u papa ùn cumprumettia l'avvenire è si riservava u dirittu di toglie sti favori à Pisa. E ciò ch'ellu accaderà dui seculi dopu.

Intantu, dicia Gregoriu VII à i Corsi, certi omi currotti hanu usurpatu l'isula ch'è pruprietà di a Santa Sede rumana ; è u vostru dovere di scaccià l'usurpatori è di ristabilì a duminazione pontificale.

Si pò omu dumandà perchè u papa dispunia cusì facilmente di a Corsica. A chjama di certe cumunità è a dunazione di Mattilda un bastanu per spiegà è faccende di Gregoriu.

A quelli tempi ci averebbenu dettu ch'è u papa facia rispettà a dunazione di Custantinone, u primu imperatore cristianu, quellu ch'avia permessu à i cristiani di vive à fronte scupertu senza avè bisognu di fà è piattatelle.

E vera ch' Custantinu avia fattu qualch' rigalu à a basilica di San Petru, à quella di San Paulu fora accintu, è à i lochi santi di Palestina... ma ùn era una ragione per fà corre a vuciata ch'ellu avia datu Roma è tutta l'Italia à a Chjesa.

In l'ondecimu seculu credianu sempre à ista fola inventata qualch' 400 anni nanzu da a Cancelleria pontificale. E, forse, ancu qualch' papa ci averà credutu.

In fatti, senza andà cusì luntanu, a spiegazione si trova à i tempi di u primu Carulingiu : Pépin-le-Bref, istu rè di i Franchi, nipote di preti, ch' strascinava preti daretu à è so armate.

Incù a benedizione di a Santa Chjesa, Pipinu avia scacciatu l'ultimu rè pultrone è creatu a Francia à parte da a Gallia.

I papa, ùn davanu nunda di rigalu. Quandu Stefanu II vense à vede à Pipinu in Saint-Denis, ùn era micca solu per crisimallu, ma per dumandalli di prutege a cità di Roma da i Lombardi.

Pipinu passò l'Alpe, dede una rivista à i Lombardi è tracciò a carta di l'Italia cum'elli l'avianu prevista, ellu è u papa, à l'assemblea di Quierzy-sur-Oise : fece di a Lombardia una terra franca, creò u Regnu d'Italia, è accantu, a nazione pontificale.

L'affare si passò cusì... o quasi.

A Quierzy, ufficialmente, ùn trattonu chè di u patrimoni ch' a Chjesa avia in Italia è in Corsica. Ma, quandu, à u veranu di l'annu 773, carlumagnone andò in Roma, u spartimentu di l'Italia fù precisatu. E l'annu dopu, u più grande rè di u Medievu nè finia incù è pretensioni di l'ultimu rè lombardu, Desideriu, è cunfirmava a dunazione di u babbu.

Si pò dunque dì, ch' tandu a nazione pontificale era nata, incù u ducatu di Roma, l'esarcatu di Ravenna, è Cinque Cità... è a Corsica.

E, senza dubbitu, quandu Gregoriu VII assicurava ch' a Corsica era pruprietà di a Santa Chjesa rumana, accennava à quella dunazione di Pipinu è Carlumagnone.

Rivenimu à l' infeudazione di a Corsica à a cità di Pisa, infeudazione forse fora di lege, ma bella chè fatta.

Una quindicina d'anni dopu l'incontru di Canossa, l' infeudazione avia da esse assicurata da dui omi battaglieri di natura : u papa Urbanu II, è u vescu di Pisa : Daibertu.

In u 1091, Urbanu annunziava chè i veschi pisani avianu sempre u governu di a Corsica, è rinunciava à i diritti di a Chjesa nantu à l' entrate di l' isula, fora d' un' affittu, per a pruforma, di 50 lire.

L' annu dopu, fece di a Chjesa pisana un' arciviscuvatu è li dede u cumandu di i viscuvati di Corsica.

Hanu dettu chè u papa dede st' onore è favore à a cità di Pisa per fà piacè à Mattilda. Forse !... Ma, era tuttu calculu !...

Urbanu hè u papa di è cruciate, quellu chè hà messu in pratica l' idea di Gregoriu VII di liberà u Santu Sepolcru.

Quandu, da marzu à ottobre 1095, Urbanu predicava à guerra santa indi u nordu di l' Italia è in Francia, è cità marittime taliane : Pisa, Venezia, Genuva, Amafi, avianu digià prumessu d' aiutallu, è principalmente, per ringraziallu di a bolla di u 1092, i Pisani eranu pronti à fà croce falza per ellu. St' aiutu di è cità marittime era necessariu pè u trasportu è à furnitura di e truppe, è pè a difesa in mare.

U vescu Daibertu, chè era un intrigante, si campava. Pigliò u cumandu di i cruciati pisani è partì in guerra. Ghjuntu in Ghjerusalemme, si disse legatu di u papa è spusessò u patriarca Arnould Malecorne. A' so speranza era di entre in signuria.

In u 1100, à a morte de Godefroy-de-Bouillon, pocu mancò ch' ellu ùn riesca, ma, u fratellu di Gottifredu, Baudouin, avventò l' affare, fece fiascà l' intrighi è ubligò Daibertu à curunallu rè.

In u 1099, a prima cruciata era finita. Urbanu II era mortu l' annu stessu.

E galere pisane si nè eranu vultate carche d' un pocu di terra di Ghjerusalemme – chè fù lampata in Campu Santu – è d' assai roba, chè, quallandi, era natu u piglia piglia. I Pisani avianu salvatu è so anime, s' eranu empiuti è stacche, è avianu ingrandatu u so cummerciu.

Tandu, Pisa era a prima putenza in u Mediterraniu occidentale è si pò pensà ch'ella vulissi rinfurzà a so duminazione nantu à a Corsica.

Ma u stabilimentu in l'isula ùn serà micca scuccagnatu. Serà cuntrariatu da i veschi corsi ch'è ricusanu di fassi cunsacrà in Pisa, da i Genuvesi ch'è hanu di più in più pretensioni, è da i successori di Urbanu II, ch'è, in pulitica, voltanu carta cum'elli mutanu panni.

Prima ch'è Urbanu fessi di Pisa un'arciviscuvatu, i veschi corsi si facianu cunsacrà in Roma. U cambiamentu li piacì pocu è ricusonu d'andà in Pisa.

Ma istu ricusu durò pocu. L'affare si arrangiò quandu, in u 1119, l'arcivescu di Pisa ghjunse in Corsica per cunsacrà a chjesa di Mariana è u so vescu. Incù ellu ci era, un cardinale legatu di u papa è parechji canonichi – cum'è di ghjusta -, ma, dinù, une pochi di capizzoni pisani, è, soprattuttu, un certu Aldobrando, capu laicu di a cità, unu di isti ghjudici è consuli ch'è eranu in traccia di piglià forza sinu à cummandà in cità quante l'arcivescu. A cirimonia – per via di a prisenza d'Aldobrando – era una presa di pusessu di a Corsica da a cumuna di Pisa.

Di sicuru, tutta ista ghjente era venuta in Corsica nantu i cunsiglii di u papa Gelasiu II, ch'è s'era rifugiatu in Pisa quandu l'imperatore Arrigu V attaccò Roma.

Gelasiu avia una grande ricunnuscenza per i Corsi di Roma ch'è l'avianu francatu d'esse fattu prigiuneru da u partitu imperialistu di a capitale, à l'incuntrariu di u so predecessore. Urbanu II, ch'è i Corsi ùn vulianu cum'è papa, è avianu fattu tuttu per impedillu, sinu à accampà a capitale... è mancò pocu ch'elli ùn ci entrinu.

I veschi di Corsica s'eranu dunque lasciati scunvince. Ma, frà tempu, s'era scupertu l'uppusizione accanita di Genuva.

A cruciata era stata per i Genuvesi, più chè per i Pisani, un'opera di resita. Ci avianu tiratu gloria è prufittu. Incù è furniture à i Cristiani è u negoziu di i prudutti esotichi, s'eranu scupertu, per u cummerciu, una vucazione ch'elli ùn perderanu più. Genuva s'era sviluppata dopu à Pisa, ma era in traccia di piglialli a suprana.

E voglie di Genuva eranu fora di cumunu. U cummerciu di u peveru ùn l'abbastava. Vulia accaparà quellu di u sale, è quellu di e biade, indì a Riviera taliana, in Provincia, in Linguadoca. Vulia dinù

l'esclusività di u pannu di e Flandrie ch'è ghjunghjia in Mediterraniu per a valle di u Rotanu.

Istù cummerciu ci vulia à prutegelu. Genuva si fece una forte putenza militare per terra è per mare, è minacciò u so primu cuncurrente : Pisa. In pocu tempu a so duminazione si stendì u longu di e sponde di a Liguria.

In u 1113, i Genuvesi occupanu à Portu Venere, à solu 75km da Pisa.

A discordia cresce frà è duie cità ch'è entrenu in guerra dichjarata. In u 1120, i Genuvesi sò tantu potenti ch'è si ponu permette d'entre in Pisa à riguarra i so prigiuneri.

I papa eranu custretti di tene contu di a forza crescente di Genuva. I Genuvesi da parte soia, facianu tuttu per togliere a prima piazza à i Pisani, è suminavanu oru.

Calistu II, ch'è preparava u cuncurdatu di Worms, rivucò u privilegiu datu da Urbanu II à i veschi di Pisa, è turnò à dà, à a Santa Sede, a cunsecrazione di i veschi corsi. U primu cunciliu Lateranu, in u 1123, ratificò a so decisione. L'arcivescu di Pisa, ch'è era presente, saltò in cimentu, è, di sistia, ghjitò a so mitria è u so anellu à i pedi di u papa è si n'andò sbuffitandu.

Calistu II morse l'annu dopu. U so successore, Onoriu II, pigliò pretesa per i Pisani è dede torna, à u metropolitanu di Pisa, u dirittu di cunsacrà i veschi corsi.

Dopu Onoriu, ci fù Innocensu II. Ellu fece cum'è Salomone. In u 1133, fece di Genuva un'arciviscuvatu è li dede u cumandu nantu i viscuvati di Mariana, Nebbiu è Accia, lasciendu quelli d'Aleria, Aiacciu è Sagone suttu l'arciviscuvatu di Pisa.

A so sentenza, ùn fù per scioglie alcun nodu ; à l'incuntrariu, fece di a Corsica un campu di battaglia.

Mentre ch'è Pisa strughjia a so anziana cumpetente : Amalfi, Genuva a Nuvela – ùn era ancu Genuva a Superba -, pocu à pocu, pigliava a suprana à Pisa.

E duie cità eranu in lotta in Corsica, in Sardegna, indì u sudu di l'Italia, in Sicilia, in Custantinopuli. A pace fatta u 13 ferraghju 1188, e ghjurata da mille Pisani e mille Genuvesi, durò ghjustu sei anni, postu chì, in u 1195, i Genuvesi si stabilianu in Bonifaziu per parechji seculi.

Genuva avia l'avantaghju d'un avè à scumpete incù i so vicini, mentre chì Pisa era in baruffa incù Lucca, priva d'una finestra versu u mare ; incù Volterra, spusessata d'una partita di u so cunteu ; è incù Firenze, chì diventava pianu pianu una grande cità è una forte putenza, è bramava d'esse patrone nantu à l'Arnu, per avè una surtita libera versu u mare.

A u XIIImu seculu, a guerra frà Pisa è Genuva impeghjurisce, interotta ogni tantu da qualchì tregua devuta à e mediazioni di l'Imperatore o di u papa.

A signuria corsa partecipava à ista guerra, è piglava pretesa per l'una o l'altra cità.

Volto 1280, u cunflittu hè più forte chè mai. U 6 aostu 1284, è duie flotte s'inticcianu in faccia à Livornu, vicinu à l'isula di a Meloria, in una battaglia memorabile. Pisa avia mubilizatu da 20 à 60 anni, Genuva da 18 à 70 anni. L'omi si battinu pettu à pettu per di sopra e sponde di i battelli. Nè morse a medità. A superiurità genuvese, in battelli è in cummandu, ruinò à Pisa "*in ad eternu*". Pisa ebbe sette galere affundate, 28 catturate, millaie di morti, è tanti prigiuneri chì si dicia à quella epuca chì s'omu vulia vede à Pisa ci vulia à andà in Genuva.

Oramai si pensa chì a duminazione genuvese nantu a Corsica è un'affare bellu chè fattu ; è i signori corsi ghjuranu fedeltà à a Republica. Ma, i Genuvesi, chì eranu sempre uniti per fà testa à i strangeri, si tazzavanu trà d'elli per avè u putere. E' u 17 ferreghju 1297, u papa Bonifaziu VIII, chì ùn avia sapiutu prevede u bellu avvenire di a Republica di Genuva, dava i Regni di Corsica è di Sardegna à u rè d'Aragone.

Dopu avè fattu u racontu di dui seculi di duminazione pisana, averebbi vulsutu di si ista duminazione fù bona o gattiva, ma, per cunclude, sò indì l'imbarazzi, è, à dilla schietta, credu chì nisunu nè sappia nunda.

A i tempi di Montegiani nè dicianu u più gran'bè, è, ellu, ci hà trasmessu ista bona nomina.

Montegiani dice chì i Pisani amministronu a Corsica incù un governatore, ch'elli chjamavanu ghjudice, cum'ellu usava ind'è elli. U ghjudice era aiudatu da ufficiali di ghjustizia, chì avianu ordine d'esse onesti è di praticà a so carica cum'è s'elli fussinu in Pisa stessa.

A ghjustizia pisana, oramai celebre in l'isula, hè stata studiata di u cunsiglieru Mazel, à l'odienza sulenne di a Corte d'Appellu di Bastia, in u 1968.

U segnu particolare di l'amministrazione di a ghjustizia pisana, hè stata a dicentralisazione. In ogni pieve, accantu à a chjesa, è fattu cum'è ella, o in chjesa stessa, ci era un tribunale.

Dunque, ciò chì ci era di bè à quelli tempi, è chì i Corsi avianu u tribunale – a tribuna, o l'arringu, cum'è elli dicianu tandu – accantu à induve elli stavanu. Istu favore, i Corsi l'hanu persu sottu à Genuva, l'hanu ritrovu incù è ghjustizie di pace create da a Rivuluzione francese, è l'hanu torna persu ùn ci è tantu.

Montegiani dice chì a bona amministrazione durò 80 anni. Pensu ch'ellu hà ragione, è, à parè meiu, serebbi stata a ghjustizia episcopale.

Indè a storia di Pisa, trovu un cambiamentu in l'annu 1162 : st'annu, a cumuna abbandona u partitu di u papa per entre in quellu di l'imperatore Federiccu I, dettu u Barbirossu.

Aghju dettu chì à l'epuca di l'affare di Canossa, u vescu era gran'patrone in cità, è chì u putere civile era in traccia d'organizassi, ma, senza vulè piglià a piazza di u putere viscuivile. Istu putere civile era in manu à i consuli eletti indì l'associu di i cummercianti armatori. Per un mezu seculu, i consuli lascionu, à u vescu, è so anziane prerogative, postu chì u papa avia permessu à l'imprese cummerciali di fà affari in Corsica è in Siria.

Quandu, in u 1133, Innucenzu II, scumpartì i viscuvi di Corsica trà Pisa è Genuva, l'imperatori d'Alemagna capiinu chì Pisa era pronta à sottumettesi à elli. Pocu a pocu l'hanu ricunnusciutu e libertà pulitiche, l'autonomia ghjudiziaria, è ancu u dirittu di batte muneta, dirittu riservatu, sinu à tandu, à a cità di Lucca.

Fù Federiccu u Barbirossu, chì, in u 1162, messe à Pisa da latu soiu, per sempre, danduli l'autonomia à l'internu di l'Imperu.

Pisa ricunnuscì l'antipapa di Federiccu, messe l'arcivescu fora, è u rimpiazzò da un canonicu nant' à u quale pudia cuntà.

Nunda più s'upponia à una riforma di i tribunali. Quelli di u vescu sariinu per fà piazza à una ghjustizia civile, cudificata, è messa sottu a direzione d'un consule, una spezia di ministru di a Ghjustizia.

E certa chì Pisa applicò a riforma in Corsica, ma ùn avemu prove. E possibile chì l'affare si fece in mancanza di i veschi, chì, prubabilmente, si nè eranu fughjiti per ùn esse sottu a tutela d'un usurpatore. Serebbi dunque, à mezu disordine, chì i Pisani averebbinu stabilitu a nova amministrazione, è istu fattu curispunderebbi à i 20 anni di distribu chì, secondu Montegiani, hanu succedutu à l'ottanta anni di pace.

Montegiani ci dà dinù qualchì infurmazioni nantu à l'arti, è vanta a bellezza di e custruzioni pisane ; chjese è ponti soprattuttu. Eppoi dice chì tandu fecenu parechje strade, è i bagni di Petrapola

Più tardi, ista riputazione è stata ingrossata è hanu messu in capu à i Pisani tutte è belle chjese è tutte e chjese strane.

E cusì chì, storichi è archeolochi hanu sempre dettu chì a nostra chjesa di Santa Cristina, in Campulori, è stata fatta da elli... allora chì oghje pudemu accertà chì a navata è anteriore, è a cruciata incù e duie abside, pusteriore à l'epuca pisana.

So mi nè tengu à u libbru di Madama Moracchini-Mazel nantu e chjese rumane di Corsica, contu chì nè resta una trentina da i tempi di Pisa. E più assinalate sò : quelle di San Michele di Muratu, e catedrali di Mariana è di u Nebbiu, è a chjesa San Ghjuvanbattista di Carbini.

Montegiani avia ragiò d'incantassi, chì u prugressu di l'architettura pisana nantu à quella di l'altu Medievu, era nutevule. Ma, in Corsica, hè ghjuntu pochi affari di a plastica pisana. Un' ci hè nisunu paragone incù ciò chì si facia in Pisa à quelli tempi : a catedrale, u battisteru, è u capanile cum'è una trinetta, cunusciutu sottu à u nome di torra pendia, un munimentu chì è statu ripruduttu milioni di volti, per u piacè di i turisti, in tutte e materie, da l'alabastu sin' à a ciculata.

Unu di i megliu medievisti francesi, hà dettu chì Pisa a custruttu, in dui seculi e mezu, u più bellu cumplessu di munimenti religiosi chì una cità possi esse fiera d'avè.

Un' ci hè da maravigliassi chì Pisa - Pisa a ricca – abbia fattu corre i più grandi artisti. Ma, ùn ci hè dinù da maravigliassi s'ella hà mandatu in Corsica – Corsica a povera – maestri di pocu valore.

Dunque, Montegiani hà dettu chì Pisa hà fattu, in Corsica, un sorzu per a bona amministrazione di a ghjustizia, è ch'ella hà fattu strade è chjese.

Poi, sò scorsi parechji seculi è parechje generazioni di storichi. Crunulugia messa à parte, chì ci hanu amparatu nantu i tempi chì Pisa guvernava a Corsica ? Pochi affari ! Un' pudianu fà di megliu, chì a storia si scrive incù i documenti, è documenti ci nè hè pochi, chì l'archive di a cumuna di Pisa sò state distrutte in u 1315. In quantu à l'archive corse, ùn ci nè hè. Cum'elle ùn sò mai state centralizzate, si porebbi pensà chì, in qua è in da, ci resta qualchì scrittoghju. Si dicerebbi di nò. A miseria, l'ignuranza, e rivuluzioni è a guerra, hanu mandatu tuttu à caternu.

Di lugliu 1966, una squadra di studianti di a Facultà d'Aix-en-Provence, diretta da Mlla Huguette Taviani, è suttu l'altu cuntrollu di u professore Georges Duby, a sbulicatu l'archive pisane. 1600 documenti sò stati microfilmati, è i studii chì seranu fatti incù issi documenti feranu forse cunnosce megliu a Corsica medievale. Ma, a più grande parte di issi documenti sò pusteriori à l'annu 1284, quandu Pisa, cum'è putenza culuniale, era nantu a falata.

Allora, intantu, stemucine nantu a bona nomina accertata da Montegiani. Ma, per contu meiu – chì sò pocu creduculu – l'imperialismu pisanu – cum'è d'altronde tutti l'imperialismi – ùn avia micca per fine a felicità di i Corsi, ma quella di mette a Corsica suttu tutela pulitica è economica.

BIBLIOGRAFIA

Giovanni della GROSSA, Pier' Antonio MONTEGIANI : " Croniche ", in Bulletin de la S.S.H.N.C., fasc. 313-324, imp. C. Piaggi, Bastia., 1910.

Bolle pontificali publicate da G.C.GREGORI in : FILIPPINI A.P. : " Istoria di Corsica... ", Pisa, 1827, 1831.

Dom J.B. GAI : " La tragique histoire des Corses ", ed. S.P.E.R.A.R., Paris, 1962.

G. MORACCHINI-MAZEL : " Les églises romanes de Corse ", lib. C.Klincksieck, Paris, 1967.

H. MAZEL : " L'administration de la justice en Corse à l'époque pisane ", imp. Administratrice, Melun, 1968.

Y. RENOUARD : " Les villes d'Italie de la fin du Xe s. au début du XI^{Ve} s. ", nouvelle éd. Ph. Braunstein, S.E.E.S., Paria, 1969.

BREQUIGNY... GALETTI... DAVIDSOHN... LE GOFF...